

CARTA HN JEE NI TEE APOSTOL SAN PABLO NUU ÑAYUU ÑUU TESALONICA

1 Máá rí cúu Pablo jíin Silvano jíin Timoteo, te cátee ri carta yáha cuájeē nuū rohó ñáyuu cáacandíje ñuu Tesalónica, jeē cáyihí ró ndaha Tátá yō Yaā Dios jíin Jítóho yō Jesucristo. Te cáñuhun ni rí jeē Tátá yō Yaā Dios jíin Jítóho yō Jesucristo, na sáha ga yā jeē váha róhó, te sáha ya jeē coo ndeyí coo sií ni rō jíjnáhan ró.

Ñayuu Tesalónica cúu i iin ejemplo vāha

²Níní cánacuatáhú rí nuū Yaā Dios jeē siquí rohó jíjnáhan ró, te tu náā ni rí cacān tahú rí jehē rō jeē cájicān tahú rí. ³Te níní ndácunehen ri rohó núū Tátá yō Yaā Dios, jeē váha cásáha ró táca jniñu chi cáacandíje ró, jíin jéē váha cájejniñu ró núū yā chi maní rō jíin yá, jíin jéē cájendeyí ni rō chi cáñuhun ni rō jeē coo jeē váha sáha Jítóho yō Jesucristo. ⁴Chi maní Yaā Dios jíin ró jíjnáhan ró hermano, te cájini rí jeē ní nacáji ya rohó. ⁵Chi ná ni canacani ri jñuhun nuū rō jeē jnáma ya rohó, te nasūu jéē ni cáhān rí súcuan-ni, chi ni nacani ri jíin poder Espíritu Santo, te ni cacacáhnu vāha ni rí jeē jñuhun

ndaā cúu. Te cájini rō ndese ni casáha vāha ri ná ni coyūcu rí jíin ró, chi ni nducú rí jeē quéndō vāha ró.

⁶Te róhó jíjnáhan ró chi ni candacu ró rúhū, te suni ni candacu ró máá Jítóho yō. Chi ni cajetáhú ró jñuhun ya, te ni cacusií ni rō ni sáha Espíritu Santo, vēsú ni cajito ró cuehē jñūdóho siquí ún. ⁷Te súcuan cácuu ró iin ejemplo nuū ndihi ñayuu cáacandíje jeē cáyucú región Macedonia jíin Acaya jíñā. ⁸Chi jeē siquí rohó jíjnáhan ró cúu jeē ní jite núu jñuhun Jítóho yō, te nasūu máni Macedonia jíin Acaya, chi suni ní cáhnu-ni ni jite núu jñuhun ndese cáacandíje ró Yaā Dios. Te jeē yúcuan tuá jíni ñühún jeē nácani máá rí jñuhun nuū i. ⁹Chi sa máá i cánacani ndese ni cajetáhú váha ró rúhū ná ni jecoo ri nuū rō, jíin ndese ni castóo ro ídolo te ni quívicoo ró ndaha Yaā Dios, Yaā ndaā Yaā técu, jeē cuajniñu ró núu yā. ¹⁰Te cánacani i jeē cándetu ró jéē ichi ándiví ndiji Sēhe ya Jesús jeē ní nastécu yā. Te máá Jesús jnama ya yohó núu castigo xeēn jeē quíji.

**Jniñu jeē ni sáha Pablo
ñuu Tesalónica**

2 Chi cájini rō hermano, jeē tu ní jécoo cāhá-ni ri nuū rō. ²Te cájini rō jeē ní castóho i ruhū te ni cacahān ndevāha i nuū rī ini ñuu Filipos. Te vēsū sūcuan te máá Yaā Dios ni chindéé ñáhán yá ruhū, ni sáha ya jeē ni íyo ndeyí ni rī, te ni jécoo ri ñuu rō ni canacani ri jñūhun jeē jnáma ya rohó. Sūcuan ni casáha ri vēsū xeēn ni íyo jñūndóho. ³Te jñūhun ni canacani ri, nasūu jñūhun ni caství ri cúu, ni nasūu jéē nihín rī siquī rō, ni nasūu jéē ní castáhú rí rohó. ⁴Chi máá Yaā Dios ni jito ndee yā ruhū, te ni tejnīñu ya ruhū jeē nácani ri jñūhun jeē jnáma ya rohó. Te jeē yúcuán cúu jeē cácahān rī. Te tu cácahān rī jñūhun jeē núnjahan ni ñayuu, chi sa jeē núnjahan ni Yaā Dios, chi máá yá jíto ndee anuá rī. ⁵Te cájini rō jeē tu ní cánducú rí cuajnúhún rí rohó ñin modo stahú, ni tu ní cácahān rī jeē cúsiñi ni rī jíin ró návāha nihín rī xūhun ró. Te jíni Yaā Dios jeē sūcuan cúu. ⁶Te ni tu ní cánducú rí jeē cuajnúhún ró ruhū, ni jeē cuajnúhún inga ñayuu ruhū, vēsū sūcuan cánuú coo núu, chi apóstol Cristo cácuu ri. ⁷Chi sa suhva vīta ní cacahān rī jíin ró, nájñūhun sáha ñahan ndéca yiquín jéē yucún ndíto ña sēhe ña. ⁸Te siquī jeē cákundáhú ndasí ni rī rohó, jeē yúcuán ní cacondihví ni rī nacani ri jñūhun vāha Yaā Dios nuū rō. Te nasūu máá yúcuán-ni, chi suni nde vida rī cuāha ri jeē siquí rō nuú, chi yōhyo manī rī jíin ró. ⁹Te cánahan ró hermano, jeē tú ni ñin ró ní

stáhān rī jeē cacān rī nuū rō ná ni canacani ri jñūhun vāha Yaā Dios nuū rō. Chi ni canducú ndeyí rí ni casájniñu ndasí rí siquī jeē cótecu rī. Te nduú ñuú ni casájniñu rī.

¹⁰Máá ró cájini rō, te suni Yaā Dios jíni yā ndese ndaā ndoo ni cajica ri nuū rohó ñayuu cácañdije. Te ni ñin tu cúu cahān cuēchi siquī rī. ¹¹Te suni cájini rō ndese ni castíhvī ni rī ná ñin ná ñin ró, te ni cacahān rī jñūhun ndeyí ni jíin ró, nájñūhun sáha ñin tátá jíin sēhe de. ¹²Te ni cacahān ñihin ri jíin ró jeē na cáca ndaā rō nuū Yaā Dios nájñūhun cánuú caca ró. Chi ni cana ya rohó jéē quíngoo ró núu ndácu ya jniñu, nuū luu cujéñu ró jíin yá.

¹³Te jeē yúcuán níni nácuatáhú rí nuū Yaā Dios, chi ni cajetáhú ró jñūhun ya jeē ní canacani ri. Chi ni cajini rō jeē násūu jñūhun ñin tēe cúu, chi jñūhun Yaā Dios cúu. Te máá jéndaá jeē jñūhun un sájniñu ini anuá rohó ñayuu cácañdije nde ndacu ró yá. ¹⁴Hermano, ñayuu ñuu rō ni cajito xeēn i rōhó, te sūcuan ni candoho ró nájñūhun ni candoho ñayuu cácañdije cáyucú región Judea jeē cáyihī ndaha Yaā Dios jíin Cristo Jesús. Chi nájñūhun ni candoho i ni sáha jnáhan i ñayuu hebreo, suni sūcuan ni candoho ró. ¹⁵Chi suu ñayuu hebreo ni cajehni de máá Jítoho yō Jesús, nájñūhun ni cajehni de táca tēe ñuu de jeē ní canacani jñūhun ya nde jenahán. Te suni nde ruhū jijnáhan ri ni cascúnu de. Te casáha de jniñu jeē tu núnjahan ni Yaā Dios, te cúu de contra siquī táca ñayuu. ¹⁶Chi jésicoo de jeē ma nácani ri jñūhun

nuū ñáyuu t́acá nacíon jeē tu jíni, návaha tú ćacu i. Te śucuan śaha de jeē nducuehē gá cuēchi siquī de. Te vijna te yachi quiji quivī jeē cuaha Yaā Dios castigo xeēn nuū de.

Jeē cuní Pablo quicōndēhé tucu de ñayuu Tesalónica

¹⁷Hermano, ni cacujio ri iin núnúu-ni nuū rō jijnáhan ró. Te vésú tu cájito jnáhan yó, te níni cáñuhun ni rī rohó. Te yōhyo ni cacuu ni rī ndacoto ri nuū rō jijnáhan ró. ¹⁸Te jeē yúcuan ní cajeni ni rī jecoo ri nuū rō nuú. Te ruhū Pablo, t́ijni jínu ni nducú rí modo jeē rī, te Satanás ni jesi ichi ri jijnáhan ri. ¹⁹Chi tuá na inga cáñuhun ni rī, te tuá na inga cácusīi ni rī, chi suu máá ró jijnáhan ró. Te jeē siquī maá ró cúu jeē nihín rī premio rī te cusīi teyí ni rī cuiñi yó núu maá Jítóho yō Jesucristo quivī ndíji ya. ²⁰Suu jeē siquī rohó cúu jeē cácusīi teyí ni rī.

3 Te jeē yúcuan tuá ni ćacanda ri condetu ri nde nihín rī jnūhun ndese cáhiyo ró. Te ni casándaā rī jeē quéndōo máá-ni rī ñuu Atenas. ²Te ni cataj́i rí hermano yō Timoteo, t́ē jéjníñu jíni rí nuū Yaā Dios siquī jnúhun jeē jnáma Cristo yohó. Te ni jecondēhé de ŕohó návaha śaha de jeē cuiñi nihin ró te coo ndeyí ni rō jíni jnúhun ćacandíje ró. ³Te ni jeē de návaha ma náyūhú ni iin ró síquī táca jnúndóho jeē śaha ñayuu. Chi je cájini rō jeē śucuan ćanuú ndoho yó. ⁴Chi nde ná ni coyūcu rí jíni ró, te ni cacastūhun rí nuū rō jeē nihin nahín yó jnúndóho. Te je cájini rō jeē śucuan ni cuu, nájnūhun ni

cacahān rī. ⁵Te jeē yúcuan, náa tuá ni ćanda ri condetu ri jeē nihín rī jnūhun ndese cáhiyo ró, te ni tají rí de ni jeē de, návaha cuni rī núu ćacandíje nahín ró. Chi ni jeni ni rí á sanaa te jexeén jeē jíto ndee yohó ní cundeyí jíni ró, te naa ćahá-ni jniñu jeē ní casáha ri jíni ró.

⁶Te vijna chi je ni ndee Timoteo nuū rī jijnáhan ri jeē ni jéē de ñuu rō Tesalónica. Te ni nacani de jeē ćacandíje v́aha ró, te ćacundáhú ni rō jnáhan ró. Te ni cachi de jeē cáñuhun ni rō ruhū, chi cáhiyo manī rō jíni rí. Te ćacuni rō ndacoto ró núu rī, nájnūhun ćacuni rī ndacoto ri nuū rō. ⁷Te jeē yúcuan ní candusiī ni rī siquī jeē ćacandíje v́aha ró, hermano, vésú xeēn iyó jnúndóho siquī rī. ⁸Te vijna je ni cananihín ni rī, chi cáhiin nihin ró jíni máá Jítóho yō. ⁹Núu śucuan te tu jínu cuiti nacuatáhú rí nuū Yaā Dios jeē siquī rohó jijnáhan ró. Chi jíto ya jeē cácusīi ndasí ni rī jeē śucuan cáhiyo ró. ¹⁰Te nduu ñuu cájicān tahú ndasí rí jeē ndácoto tucu ri nuū rō, te stéén gá rī na-ni jnūhun cúmani jecūhun ni rō siquī jnúhun ćacandíje yó.

¹¹Te ćacuni rī jeē maá T́atá yō Yaā Dios jíni Jítóho yō Jesucristo, na núne ya ichi jeē cuu jecoo tucu ri nuū rō. ¹²Te na śaha máá Jítóho yō jeē cuehē ndasí gá cundáhú ni rō jnáhan ró jíni táca gá ñayuu, nájnūhun ćacundáhú ni rī rohó jíni rí. ¹³Te na śaha ya jeē íje ánuá rō jeē cuiñi nihin ró, návaha coo ndoo ró jéē ma cóo cuēchi ró núu maá T́atá yō Yaā Dios, quivī ndíji Jítóho yō Jesucristo jíni táca ñáyuu yíhi ndaha ya.

**Siquī jeē caca ndaā yō
modo jeē cúsīi ni yā**

4 Te vijna hermano, íyó inga jñūhun jeē cácahān ndahú rí jíin ró te cáhán nihin ri jíin ró, chi súcuan cúní maá Jítóho yō Jesús. Je ni castéén rī nuū rō ndese cánuú caca ndaā rō návāha cusīi ni Yaā Dios. Te cácahān ndahú rí jíin ró jeē sa víhyá gā na cáca ró súcuan.

²Chi je cájini rō na jniñu ni candacu ri nuū rō jeē ní ndacu máá Jítóho yō Jesús. ³Te cúní Yaā Dios jeē na cóo ndoo coo iī rō nuū yā, te ma cáca jnéni ró. ⁴Te ná iin ná iin ró na cóndeca yíñúhún ró ñasihí máá ró, te súcuan caca ndoo ró. ⁵Te ma sáha ró jniñu néé jéé ndíyo ni rō jesihí, nájnūhun cásáha ñayuu tācá nación jeē tu cájini i jñūhun Yaā Dios. ⁶Ni iin ró ma sáha ró cuéchi jeē quénde rō ñasihí jñáhan ró. Chi máá Jítóho yō cuāha ya castigo xeēn nuū ñayuu casáha tācá jniñu súcuan, nájnūhun je ni cacahān nihin ri ni castūhun rí nuū rō. ⁷Chi tu ní cána Yaā Dios yohó jéé sáha yó jniñu jnéhén, chi sa jeē caca ndoo yó. ⁸Núu súcuan te ñayuu jeē squéhichī jñūhun yáha, nasūu jñūhun iin tēe squéhichī i, chi sa jñūhun Yaā Dios, Yaā ni jéhe Espíritu Santo nuū yō.

⁹Te tu jíni ñúhún jéé téé ri nuū carta yáha jéé coo manī rō jíin táca hermano, chi je ni steén Yaā Dios nuū rō jeē coo manī rō jíin jñáhan ró. ¹⁰Te je cáhiyo manī rō súcuan jíin táca hermano cáyūcu níí cáhnu Macedonia jiñā. Te cáhán ndahú rí jíin ró hermano, jeē sa víhyá gā na cóo manī rō jíin i. ¹¹Te na

cóndihvī ni rō coyūcú nayúú ró, te ma cóndihvī ni rō siquī ndese cásáha jñáhan ró, chi condihvī ni rō sáha ró jniñu máá ró, nájnūhun ni candacu ri nuū rō. ¹²Súcuan na sáha ró návāha ñayuu tu cándíje, cuatáhú i róhó, te suni ma cúmani jeē cotecu rō.

Siquī jeē ndíji Jítóho yō

¹³Suni cácuni rī, hermano, jeē na jécūhun ni rō jijñáhan ró siquī ñayuu cájihī, návāha ma cucuíhyá ni rō nájnūhun sava ga ñayuu jeē tu cáñuhun ni i jeē nátecu ndíyi. ¹⁴Chi nájnūhun cácañíje yó jéé ni jíhī Jesús te ni natecu yā, suni súcuan cácañíje yó jéé nastécu Yaā Dios tāca ñayuu ni cacandíje nuū Jesús te ni cajihī.

¹⁵Jeē yúcuan cácastūhun rí iin jñūhun jeē ní castūhun máá Jítóho yō nuū ri: Jeē yóhó jéé cátecu gā quivī ndíji máá Jítóho yō, nasūu máá yó cosnūu jéé ndaa yó quíhīn yō. Chi xihna gā ñayuu je ni cajihī ndaa i quíhīn i. ¹⁶Chi máá Jítóho yō nuu ya quiji ya ichi ándiví, te cana jee ya jeē maá yá ndácu jniñu, te cana jee ndajéhe cuyéhnu ga, te cuecu trompeta Yaā Dios. Te xihna gā natecu tāca ndíyi jeē ní cacandíje Cristo. ¹⁷Yúcuán na te yóhó jeē cátecu gā yō quivī ndíji ya, suni ndonehen ya yohó jíin i, quíhīn yō mēhñu vícō. Te naquijnáhan yó jíin máá Jítóho yó sava andiví. Te súcuan condee yó níí cáni jíin máá Jítóho yō. ¹⁸Núu súcuan te jíin jñūhun yáha cahān ndeyí ni rō jíin táca jñáhan ró.

5 Te tu jíni ñúhún jéé téé ri nuū carta yáha siquī cuiyā

chí quívī jeē coo tācá un, hermano. ²Chi je cájini vāha ró jēē iin sanaa ni yō te quee quívī ndíji máá Jítóho yō, nájñuhun iin sanaa ni yō te quíji ñacuihná jecuáá. ³Chi ná-ni cácahān ñayuu jeē nayúú-ni iin te tú na jñúndóho coo, te ná-ni cácahān i súcuan te iin sanaa ni i te quíji jñúndóho siquī i jeē náā i, te ma cácu cuiti i. Chi quíji quívī un nájñuhun iin sanaa-ni te quejéé jéhdē chíji iin ñahan scácu sēhe. ⁴Te rōhó hermano, tu cácuu ró ñáyuu cájica nájñuhun nuū néē jeē iin sanaa-ni te quíji quívī un siquī ró nájñuhun quíji ñacuihná. ⁵Chi ndíhi ró cácuu ñayuu jeē nájñuhun cájica ró nduú, chí stéén luz yā ini anuá ró. Chi tu cácuu yó nájñuhun ñayuu jeē tu jécūhun ni siquī Yaā Dios, jeē nájñuhun cájica i nuū néē. ⁶Núu súcuan te ma cúhuun ni yō nájñuhun ñayuu cáquixī, chí sa ndito na cóo ni yō te coo cájí xínī yō. ⁷Chi jecuáá cúu jeē cáquixī ñayuu, te suni jecuáá cúu jeē nájini i. ⁸Te máá yó chí nájñuhun jeē cájica yó nduú, te na cóo cájí xínī yō. Te na cúcutú yó jín jñuhun cándíje nihin yó jín jñuhun cúndáhú ni yō jnáhan yó, nájñuhun cúcutú soldado jín sahma cáa. Te na cúcutú yó jín jñuhun jeē cáñuhun ni yō jeē cācu yó, nájñuhun cúcutú soldado jeē ñúhun lélú cāa xinī de. ⁹Chi Yaā Dios tu ní jéni ya yohó jéē cuáha ya castigo yohó, chí sa suhva jeē jnama ya yohó sáha máá Jítóho yō Jesucristo. ¹⁰Te máá yá ni jihī yā jehē yō, návāha cotecu iñuú yó jín yá, vēsú núu cotecu gā yō ñayīví yáha chí cúu yō. ¹¹Núu súcuan te

cahān ró jñuhun ndeyí ni jín táca jnáhan ró, te scuéhnu jnáhan ró jín jñuhun ya, nájñuhun je cásáha ró.

Jeē jéni ichí Pablo tācá hermano

¹²Te cácahān ndahú rí jín ró hermano, jeē cuatáhú ró tēe cájejníñu cándito rōhó, jeē cácujeñnu de nuū ró jín jniñu máá Jítóho yō, te cájeni ichí de rōhó.

¹³Te coo yíñuhún ndasí ró nuū de, te coo manī ró jín de siquī jniñu ya jeē casáha de. Te na cóyūcu manī ró jín táca jnáhan ró.

¹⁴Te suni cácahān ndahú rí jín ró hermano, jeē na stíhvī ni ró ñayuu cájica cúxí. Te cahān ró jñuhun ndeyí ni jín ñáyuu jeē yachī ndínuu ni i. Te chindéé ñáhán ró ñayuu jeē tu fuerza ini. Te cuandeyí ni ró jín ndíhi ñayuu.

¹⁵Te coto má nasáha ndevāha ro jín ni iin ñayuu te núu sáha ndevāha i jín ró. Chi máni jeē váha nducú ró sáha ró jín táca jnáhan ró jín ndíhi-ni ñayuu.

¹⁶Níní na cóo siñ ni ró jijnáhan ró. ¹⁷Te níní na cácan tahú ró. ¹⁸Te nacuatáhú ró jeē siquí tācá-ni. Chi súcuan cúní Yaā Dios jeē sáha ró jéē cácañdije ró Cristo Jesús.

¹⁹Te ma cásí ró nuū jniñu jeē sáha Espíritu Santo jín ró. ²⁰Te ni ma cújéē ni ró nuū jñuhun cácahān tēe cácanani jñuhun Yaā Dios. ²¹Chi coto ndee ró táca jñuhun, te núu jeē váha cúu, te cuatáhú ró. ²²Te ma quívī nduu ró jín ni iin jniñu néé.

²³Te máá Yaā Dios jeē jéhe jñuhun ndeyí sñī ni, ñúhun ni rí jeē sáha ndíhi ya jeē cóo ndoo coo ií ró nuū yā. Te ñúhun ni rí jeē cóndito vāha ya anuá ró jín

jéē nǐjnūnǐ rō, jíin yíqui cúñu rō, návāha tú na cuēchi coo siquǐ rō quivǐ ndǐji máá Jítóho yō Jesucristo. ²⁴Chi Yaā jeē ní cana róhó, sáha ya ndihi un jíin ró, chi squícu ya jeē ni jéjnūhun ya.

Saludo jíin bendición jeē sándihí

²⁵Hermano jijnáhan ró, cacān tahú rō jehē rǐ jijnáhan rǐ.

²⁶Te núu na cáhán rō jíin táca hermano, te techūhu yǐñúhún ró ndaha i.

²⁷Te cáhán nihin rǐ jíin ró, chi súcuan cúní maá Jítóho yō, jeē na cáhu ró carta yáha núū tācá hermano.

²⁸Te ñúhun ni rǐ jeē maá Jítóho yō Jesucristo na sáha ga yā jeē váha róhó. Súcuan na cóo. Amén.